

# Weh Wi Ga Fi Seh

Wi don paas migl a  
di yaa: How tingz?

## ***Di Kriol ... nais nais!***

Tudeh, wi soh hapi hapi fi big op wahn nais nais nais plays weh di kuk op sohn deh-aan Kriol food! Wi di tel unu bowt “Di Kriol Kitchen and Lounge.” Ih deh pahn “Youth for the Future Drive” eena Bileez Siti, rait neks tu di Chrafik Dipaatment ayrya.

**Di Kriol** jos oapm op di ada day! Sohn a wi fahn di Kriol Kongsl mi dehdeh fi salibrayt wid di oana and wid di manija ahn adarels pipl hoo mi dehdeh fi di oapnin. Di oana da **Miz Laurajeon Flowers**. Miz Laurajeon Flowers mi geh di aidyaa fi opan “Di Kriol Restaurant and Lounge” sayk a ih preshos mama. Her ma paas weh, bot mi put di faiya eena Miz Laurajeon fi staat op **Di Kriol**. Pahn tap, wi big op di manija, **Miz Sherlette Gamboa**...lat a wi kaal Miz Sherlette, Miz Sherlz. Az manija, Miz Sherlz di ron tingz karek karek, di mek shoar aal di food nais nais nais ahn evriting dehdeh wen yu step een er aada food. Pahn tap, yu ku aalwayz kaal fi aada er geh dehn speshal a di day. Kaal 227-3273 er Whatsapp 628-4907. Sohn a di nais nais Kriol food weh yu ku bai da **Di Kriol**:

**\*rais ahn beenz wid difrant kain a meet**

**\*schoo beenz ahn kuknat rais wid difrant kain a meet**

**\*okro ahn beef**

**\*kow fut soop**

**\* split peez**

**\* taakos (poak, beef, chikin)**

**\*terki wing**

Soh ...dat da jos fi teez unu! Yu waahn moa? Noh fret: Jos kaal di nomba dehn wi don put da tap, er, beta yet, step intu **Di Kriol** fi wahn nais nais taim---ahn food! Wi big op dehnya too laydi dehn. Dehn di promoat **Kriol kolcha** eena dehn food ahn wid di nayhn a dehn restorant ahn dehn lov a Kriol kolcha!

Silvaana Udz, Ed.D da fahn Bileez. If yu waahn tel shee bowt sohnting speshal fu put eena dis Kriol aatiki, eemayl: [sudz142@gmail.com](mailto:sudz142@gmail.com) **Vizit: [www.nationalkriolcouncil.org](http://www.nationalkriolcouncil.org)**